

Na osnovu člana 15. Zakona o naučno istraživačkom radu („Sl. novine Kantona Sarajevo“ broj 26/16), člana 92. Statuta Univerziteta u Sarajevu i člana 5. Pravilnika o unutrašnjoj organizaciji i sistematizaciji radnih mjesta Fakulteta političkih nauka, na sjednici Vijeća održanoj dana 28.02.2017.godine usvojen je

## **P R A V I L N I K** **O ORGANIZACIJI RADA INSTITUTA ZA DRUŠTVENA ISTRAŽIVANJA**

### **I OSNOVNE ODREDBE**

#### **Član 1.**

Pravilnikom o organizaciji rada Instituta za društvena istraživanja Fakulteta političkih nauka Univerziteta u Sarajevu (u daljem tekstu Pravilnik) uređuje se: djelokrug rada Instituta, organizacija i status Instituta, organi i osoblje Instituta, naučna zvanja, izdavačka djelatnost i finansiranje Instituta.

#### **Član 2.**

Djelokrug rada Instituta podrazumijeva fundamentalna, aplikativna i razvojna istraživanja u skladu sa odredbama Zakona o naučnoistraživačkoj djelatnosti (Službene novine KS br. 26/16, u daljem tekstu Zakon o naučnoistraživačkoj djelatnosti), a za potrebe Fakulteta, privrednih i državnih subjekata, političkih stranaka, organa i organizacija, te ostalih domaćih i međunarodnih institucija i društva u cjelini.

#### **Član 3.**

Institut je nadležan za:

- a) razvijanje i unapređivanje naučnoistraživačkog rada iz naučnih oblasti koje se izučavaju u okviru matičnih odsjeka Fakulteta;
- b) unapređivanje oblika i metoda prenošenja i stjecanja znanja radi podizanja efikasnosti studiranja;
- c) stručno i istraživačko osposobljavanje izrazito vrijednih i talentovanih studenata i mladih istraživača;
- d) organiziranje i realiziranje naučnoistraživačkog i stručnog rada, prema potrebi i za druga pravna lica;
- e) publikovanje rezultata naučnoistraživačkog i stručnog rada iz oblasti djelovanja Instituta;
- f) formiranje ekspertnih timova za rješavanje kompleksnih zadataka iz domena djelovanja Instituta;
- g) saradnja sa naučnoistraživačkim i drugim organizacionim jedinicama Univerziteta i drugim visokoškolskim ustanovama u zemlji i inozemstvu iz svoje i srodnih oblasti djelovanja;
- h) druga pitanja utvrđena općim aktima Fakulteta, Statutom Univerziteta i Zakonom.

### **II ORGANIZACIJA I STATUS INSTITUTA**

#### **Član 4.**

Institut za društvena istraživanja je podorganizaciona jedinica Fakulteta, sa djelatnostima, principima i ciljevima utvrđenim ovim Pravilnikom, Statutom Univerziteta i Zakonom.

Institut za društvena istraživanja nema status pravnog lica, radi i djeluje u okviru Fakulteta.

#### **Član 5.**

U okviru Instituta formiraju se centri za pojedine oblasti naučnoistraživačkog rada.

Odluku o formiranju centra donosi Vijeće Fakulteta na prijedlog dekana.

#### **Član 6.**

Po istoj proceduri donosi se odluka o prestanku rada određenog centra ili njegovom preimenovanju.

#### **Član 7.**

Centri imaju svoje voditelje koje imenuje Dekan uz konsultacije sa Prodekanom za naučno-istraživački rad, a na prijedlog Rukovodioca Instituta.

#### **Član 8.**

Sastavni dio Instituta je Centar za izdavačku djelatnost.

#### **Član 9.**

Uslov za izbor voditelja centra je naučni stepen doktora ili magistra nauka, s tim da u ukupnoj strukturi rukovodioca centara u zvanju magistra nauka ne može biti više od 40%.

### **III ORGANI INSTITUTA**

#### **Član 10.**

Organi Instituta su:

1. Vijeće Instituta,
2. Savjetodavni odbor Instituta,
3. Rukovodilac Instituta.

#### **Član 11.**

Vijeće Instituta razmatra problematiku rada Instituta i predlaže mjere za unapređenje rada, usvaja programe rada i godišnji Izvještaj o radu Instituta. Vijeće Instituta čine Dekan, Sekretar Fakulteta, Prodekan za naučno-istraživački rad i Prodekan za međunarodnu saradnju.

## Član 12.

Savjetodavni odbor Instituta je stručno-operativno tijelo kog čine Rukovodilac Instituta, voditelji centara i Prodekan za naučnoistraživački rad, koji istovremeno i predsjedava Savjetodavnim odborom Instituta.

Sjednicama Savjetodavnog odbora Instituta prisustvuju i učestvuju u radu Dekan Fakulteta.

## Član 13.

Nadležnosti Savjetodavnog odbora Instituta:

- razmatra program rada Instituta;
- razmatra prijedloge projekata i predlažu dekanu Fakulteta potpisivanje ugovora za realizaciju projekata;
- predlaže izvršioce timova za rad na projektima;
- predlaže edukaciju osoblja za angažmane na pojedinim projektima;
- pokreće inicijative i predlažu naučnoistraživačke i istraživačke projekte po naučnim oblastima (centrima);
- razmatra Izvještaj o radu Instituta na godišnjem nivou;
- predlaže saradnju sa drugim naučnoistraživačkim institutima i organizacijama;
- usvaja program naučnoistraživačkog rada Instituta;
- utvrđuje programe stručnog usavršavanja naučnika i istraživača;
- utvrđuje naučnoistraživačke projekte i prati njihovu realizaciju, daje odgovarajuće smjerenice, predlaže voditelje projekata i ocjenjuje kvalitet ostvarenih projekata;
- utvrđuje izdavačku politiku.

## Član 14.

Rukovodilac Instituta:

- organizuje i rukovodi radom Instituta za društvena istraživanja;
- radi na implementaciji programa razvoja naučnoistraživačkog i istraživačkog rada Fakulteta;
- radi na obezbjeđenju uslova za bavljenje naučnoistraživačkim i istraživačkim radom i predlaže mjere za njegovo unapređenje;
- prati i koordinira realizaciju istraživačko-razvojnih projekata Fakulteta;
- prati i informiše organe Fakulteta o naučnoistraživačkim projektima koji su na raspolaganju;
- predlaže usavršavanje nastavnika i saradnika u sticanju novih i produbljivanju stečenih znanja;
- priprema prijedloge projekata za Naučno vijeće Fakulteta i Savjet Instituta Fakulteta;
- učestvuje u radu Savjeta Instituta i Naučnog vijeća kada razmatra pitanja iz djelokruga rada Instituta,
- obavlja i druge poslove koji po svojoj prirodi spadaju u nadležnost Instituta za društvena istraživanja, a po nalogu Dekana Fakulteta.



Za svoj rad rukovodilac je odgovoran Dekanu Fakulteta.

Rukovodilac Instituta je lice sa naučnim ili nastavničkim zvanjem koje imenuje Vijeće Fakulteta na prijedlog dekana na period trajanja mandata dekana.

Nastavniku Fakulteta imenovanom za rukovodioca Instituta za vrijeme trajanja funkcije pripada pravo naknade za obavljanje funkcije rukovodioca podorganizacione jedinice u skladu sa članom 75. Pravilnika o radu Fakulteta.

#### **IV OSOBLJE INSTITUTA**

##### **Član 15.**

Osoblje Instituta čine:

- Naučnoistraživačko osoblje,
- Stručni saradnik za administrativne poslove.

##### **1. Naučnoistraživačko osoblje**

##### **Član 16.**

Naučnoistraživačko osoblje su osobe izabrane u nastavno naučna zvanja (redovni profesor, vanredni profesor i docent) i saradnička zvanja (viši asistent i asistent), te osobe izabrane u naučna zvanja (naučni savjetnik, viši naučni saradnik, naučni saradnik) i istraživačka zvanja (stručni savjetnik, viši stručni saradnik, stručni saradnik).

##### **Član 17.**

Izbor u naučna i istraživačka zvanja se vrši u skladu sa Zakonom o naučnoistraživačkoj djelatnosti.

##### **Član 18.**

Način i obim angažmana naučnoistraživačkog osoblja iz člana 16. ovog Pravilnika će se vršiti u skladu sa potrebama Instituta.

##### **2. Viši stručni saradnik za administrativne poslove**

##### **Član 19.**

Opis poslova i uslovi radnog mjesta su definisani Pravilnom o unutrašnjoj organizaciji i sistematizaciji radnih mjesta Fakulteta.

##### **Član 20.**

Na naučnoistraživačkim i istraživačkim poslovima, kao i administrativnotehničkim poslovima mogu se angažirati i studenti volonteri.

U istraživačke timove i druga ekspertna tijela mogu biti privremeno angažovana lica koja nisu uposlenici Fakulteta.

## V CENTAR ZA IZDAVAČKU DJELATNOST

### Član 21.

Centar za izdavačku djelatnost, u okviru svoje redovne djelatnosti za potrebe nastavno-naučnog i istraživačkog rada, izdaje i objavljuje:

- udžbenike, skripte, hrestomatije i priručnike;
- časopise sa matičnom ili interdisciplinarnom naučnom tematikom;
- rezultate istraživanja, naučnih savjetovanja, naučne monografije, zbornike radova, studije za potrebe naučnoistraživačkog rada, samostalno ili sa univerzitetima i fakultetima iz zemlje i inostranstva;
- godišnjake i druga izdanja Fakulteta.

### Član 22.

Uređivačko- izdavačku djelatnost realizira Izdavački savjet i Uređivački odbor.

### Član 23.

Izdavački savjet svih publikacija Fakulteta bira Vijeće Fakulteta iz reda nastavnika i viših asistenata na period od dvije (2) godine.

Izdavački savjet broji pet članova i svaki odsjek predlaže po jednog člana.

### Član 24.

Izdavački savjet predlaže Savjetodavnom odboru Instituta plan i opću politiku izdavačke djelatnosti, a uredniku časopisa, zbornika, godišnjaka i drugih publikacija koncepciju svakog pojedinačnog izdanja.

Za svoj rad Izdavački savjet odgovara Vijeću Fakulteta i dekanu Fakulteta.

### Član 25.

Uređivački odbor svih publikacija čine: dekan Fakulteta, prodekani i urednik časopisa, zbornika, godišnjaka i drugih publikacija Fakulteta, a kog bira Vijeće Fakulteta na mandatni period od dvije godine.

Funkciju odgovornog urednika svih izdanja Fakulteta vrši dekan Fakulteta.

### Član 26.

Organi izdavačke djelatnosti su dužni da brinu o zaštiti autorskih i materijalnih prava od povreda koje mogu učiniti treća lica, uključujući i studente.

### Član 27.

Pitanja štampe, distribucije i posebne knjižarske prodaje, kada to bude potrebno, se moraju doraditi posebnim aktom u skladu sa Zakonom i opštim aktima Univerziteta i Fakulteta.

## VI FINANSIRANJE INSTITUTA

### Član 28.

Institut se finansira iz sredstava budžeta osnivača, donacija, iz vlastitih prihoda Fakulteta i prihoda koje ostvari iz projekata Instituta.

### Član 29.

Fakultet će za potrebe naučnoistraživačkog rada i izdavačku djelatnost<sup>1</sup> izdvajati do 1% od vlastitih prihoda, a u skladu sa mogućnostima i Finansijskim planom Fakulteta.

Iz sredstava ostvarenih realizacijom projekata za subjekte van Fakulteta, nakon pokrića troškova uzrokovanih projektnom realizacijom, u pravilu iz svakog projekta je potrebno izdvojiti 7% sredstava za Fakultet, ukoliko konkretnim projektom nisu postavljeni drugačiji uslovi, a Fakultet ima interes da prihvati projekat.

### Član 30.

Finansijski efekti i interes Fakulteta predviđeni projektom u skladu sa članom 29. ovog Pravilnika su osnov za prihvatanje projekata i zaključivanje ugovora.

### Član 31.

Poslovanje Instituta će se odvijati u okviru jedinstvenog poslovanja Fakulteta, s tim da će se interno voditi finansijska evidencija po svakom projektu, uz otvaranja podračuna za Institut, odnosno projekat.

## VII ZAVRŠNE ODREDBE

### Član 32.

Ovaj pravilnik stupa na snagu 8 (osam) dana od dana objavljivanja na oglasnoj ploči Fakulteta.

Broj: 02-1-189-2/17  
Sarajevo, 28.02.2017.goddine

Pravilnik objavljen na ogl. ploči i web stranici  
Fakulteta 28.02.2017.godine.

